

IV

Î aivôs dînche aippris ènne sgonde tchôse brâment împoétchainne : Ç' ât qu' sai piaînnatte d' orine (*d'origine*) était è poinne pus grante qu' ènne mâjon !

Çoli ne poéyât p' me churpâre brâment. Î saivôs bîn qu' en dfeû des grôsses piaînnattes cment lai Tière, Jupiter, Mars, Vénus, ésquélles an ont bèyie des noms, è y' en é des centaines d' âtres que sont quéques côs chi ptétes qu' an ont brâment d' mâ è les voûr. Tiaind qu' î n' aichtronanme en trove yènne, è yi bèye po nom î n' nînmrô. È l' aippeule poi ésempye : « l' aichtrat (*astéroïde*) 3251. »

Î aî de chériouses réjons de craire que lai piaînnatte dâs laivoû vniait lo ptét pînce ât l' aichtrat B 612. Çt' aichtrat n' ât aivu vu qu' î n' cô â laivivoit (*télescope*), en 1909, poi î n' aichtronanme turc.

Èl aivait fait dâli ènne grante démôchtrâchion d' sai détièvre en î n' Congrès Întrannaichionâ d' Aichtronanmie. Mains niun ne l' aivait craiyu è câse de son cochtume. Les grantes dgens sont dînche.

Hèy'rous'ment po lai r'putâchion de l' aichtrat B 612, î n' ditaitou (*dictateur*) turc récoué (*imposa*) en son peupye, d' dôs roûtche (*sous peine*) de moûe, d' se véti en l' Européinne. L' aichtronanme é rfaît sai démôchtrâchion en 1920, dains ènne véture brâment séjainne (*élégante*). Èt ci cô-li tot l' monde feut d' son avis.

Ch' i vos aî rcontè ces détaiyes tchu l' aichtrat B 612 èt ch' i vos aî confiè son nînmrô, ç' ât è câse des grantes dgens. Les grantes dgens ainmant les tchiffres. Tiaind qu' vos yos djâsèz d' î n' nové l' aîmi, èlles ne vos quèchtionant djmais tchu l' ésseinchiâ. Èlles ne vos diant djmais : « Ç' ât quoi l' tîmbre de sai voûe ? Ç' ât quoi les djûs qu'èl ainme lo meu ? Ât-ce qu' è coullèchionne les voupés (*papillons*) ? » Èlles vos dmaindant : « Quél aîdge ât-ce qu' èl é ? Cobîn ât-ce qu' èl é d' frères ? Cobîn ât-ce qu' è poiye ? Cobîn diaingne son pére ? » Aidonc dampie (*seulement*) èlles craiyant l' coégnâtre. Ch' vos dites és grantes dgens : « Î aî vu ènne bèlle mâjon en britches rôjes, aivô des poulas (*geraniums*) és finétes èt des colons tchu les toéts... » èlles ne pairveniant pe è s' botaie en tête çte mâjon. È yos fât dire : « Î aî vu ènne mâjon de cent mil frains. » Aidonc èlles s' écriyant : « Cment qu' ç' 'ât bé ! »

Dînche, ch' vos yos dîtes : « Lai prouve que lo ptét pînce é éjichtè ç' ât qu' èl était brâment bé, qu' è riait, èt qu' è vlait î n' moton. Tiaind qu' an veut î n' moton, ç' ât lai prouve qu' an éjichte » èlles éyeuv'raint les épâles èt vos trét'raint d' afaint ! Mains ch' vos yos dîtes : « Lai piaînnatte dâs laivoû è vniait ât l' aichtrat B 612 » aidonc èlles sraint convaintiues, èt èlles vos lécheraint piaî n' aivô yôs quèchtions. Èlles sont dînche. È n' fât pe yos en vlait. Les afaints daint être brâment îndyuldgeints pervâs (*envers*) les grantes dgens.

Mains, bîn chur, nos que comprenians lai vie, nos s' fotans bîn des nînmrôs ! Î airôs ainmè ècmencie çt' hichtoire en lai façon des fôles (*contes*) de dj' nâches (*fées*). Î airôs ainmè dire :

« Èl était î n' cô î n' ptét pînce que dmoérait tchu ènne piaînnatte è poinne pus grante que lu, èt qu' aivait fâte d' î n' aîmi... » Po ces que compreniant lai vie, çoli airait aivu l' aîr brâment pus voirtâbye.

Poéchu' i n' ainme pe qu' an yéjeuche mon yivre en lai ladgiere. Î épreuve taint de tchaigrîn è rcontaie ces seuvnis. È y' é dje ché ans qu' mon aîmi s' en ât allè aivô son moton. Ch' i épreuve ci de déchgraiy'naie (*décrire*), ç' ât po n' pe l' rébiaie, ç' ât trichte de rébiaie î n' aîmi. Tot l' monde n' é p' aivu î n' aîmi. Èt peus i peus devni cment les grantes dgens que n' s' intèrèchant pus ran qu' és tchiffres. Ç' ât dâli po çoli encoé qu' i aî aitchtè ènne boéte de tieûlès èt de graiyons. Ç' ât mâlaîgie d' se rboitaie â graiy'naidge, en mon aîdge, tiaind qu' an n' ont djmais fait d' âtres épreuves (*tentatives*) que çtée d' î n' boa freumè èt çtée d' î n' boa eûvie, en l' aîdge de ché ans ! Î épreuveraî, bîn chur, de faire des pourtrèts lo pus eursannaints pôchibye. Mains i n' seus pe tot è fait chur de grôtaie. Î n' graiy'naidge vait, èt l' âtre ne rsanne pus. Î m' fos d' dains î n' pô âchi tchu lai taiye. Ci, lo ptét pînce ât trop grant. Li èl ât trop ptét. Î touje (*hésite*) âchi tchu lai tieulèe d' sai véture. Aidonc i chens (*tâtonne*) dînchi-dînlai (*comme ci, comme ça*), taint bîn que mâ. Î m' fotraî d' dains enfin tchu quéques détaiyes pus împoétchaints. Mains çoli, è veut fayait m' lo poidjnaie. Mon aîmi ne bèyât djmais d' échpyicâchions. È m' craiyait craibîn tot pitye (*semblable*) en lu. Mains moi, mâlhèyrouj'ment, i n' saîs pe voûr les motons â traivie les caîses. Î seus craibîn î n' pô cment les grantes dgens. Î aî daivu vni véye.